

Gyaeqqgaeq Daem Deihgiuz

Aen ndeu dwg gyaeqqgaeq byotnyieg, aen ndeu dwg deihgiuz hung' ak. Danghnaeuz aeu aen gyaeqqgaeq bae daem aen deihgiuz, mwngz rox siengj daengz gijmaz ni? Mbangj lai vunz cungj dwg mbouj siengj gijmaz couh sikhaek naeuz: Gyaeqqgaeq haengdingh soiq liux. Hoeng, ciengz saedniemh ngoenzneix, dauqfanj hawj gou doiq aen vwndiz neix miz gietlwnh moq.

Singlingz hwnj dangz ngamq yiengj, lauxsae saenzmaed dwk byaij haeuj gyausiz, riunyumnyum dwk naeuz: "Gyoengq doengzhag, ngoenzneix raeuz guh aen saedniemh mizyinx ndeu, mingzcoh heuh 'gyaeqqgaeq daem deihgiuz'." Dingqnyi aen mingzcoh geizgvaiq youh daegbied neix, ndaw gyausiz sikhaek bienq ndaej nauhyied raixcaix, gyoengq doengzhag mwngz gangj neix gou gangj haenx cenglwnh foedfoed, gwnz naj cungj hoij rim haengjheiq caeuq geizgvaiq.

Ciepdwk, lauxsae naeuz gij gvicaek doxdax: "Aeu ceijgaen, faiq, bauqceij daengj gak cungj caizliuh dauq duk aen gyaeqqgaeq le, yungh gij fuengsik doekroengz hawj aen gyaeqqgaeq bingzonj doek youq gwnz namh. Aen gyaeqqgaeq byawz ndaej mbouj vaih saek di, ndei lumj gaeuq, byawz couh ndaej hingz." Dingqnyi gij gvicaek neix, ndaw



gyausiz heiqfaenh engqgya nauhyied lo, vunzlai cungj vidgen vidga, fwngz humz raixcaix.

Sawqniemh hainduj lo! Gou siujsim riri dwk dawz gij caizliuh bwh ndei neix okdauj, aeu gij faiq unqnem haenx duk aen gyaeqqgaeq maenh ndaet gonq, lumjbaenz daenj caengz buhfuengzre nana ndeu hawj de. Ciepdwk, gou youq ndaw aen habceij demh bauqceij caeuq gaenceij, dawz aen gyaeqqgaeq duk ndei neix yaengyaeng cuengq roengzbae, caiq aeu saigyau fung ndaej youh ndaet youh maenh. Doeklaeng, gou lij aeu aen daehsuliu saeknding ndeu guh baenz aen liengjgyangqroengz ndeu, ding youq

gwnz habceij maenhmaenh bae. Gaiq fuengzre aen gyaeqqgaeq gou cungjsuengq guhbaenz lo! Yawj aen "lwgggyaeq" saeqsim guh neix, ndaw sim gou cungj saek rim maqmuengh.

Daengz seiz vut gyaeqqgaeq lo. Gou umj aen "lwgggyaeq" dauq daengz baihnaj conghecueng, seizneix, gou simdiuq bubbub, lumj ndaw fwngz mbouj dwg gaem gyaeqqgaeq, dauqdwg gaem aen cadan mbouj rox seiz lawz dek ndeu. Gou yawj roengz baihlaj bae, raen gwnz namh lumjbaenz gek daegbied gyae nei, sikhaek gyaeujngunh daraiz lo, gou nyaenx mbouj ndaej caegcaeg youq ndaw sim damz: "Rumz ha, seizneix cienfanh gaej dauq daujluenh bw!" Dingqnyi

gyoengq doengzhag cungj gujli gou, gou okrengz diem amq heiq he, couh menhmenh cuengq fwngz lo. Aen "lwgggyaeq" gou youq gyangmbwn lumjbaenz diuqfoux nei, youh baenq aen gien ndeu le, cij bibi buengqbuengq dwk mbin roengz gwnz namh bae. Aen sim gou caemh gaen de baez hwnj baez roengz, cungj mbouj an' onj saek di. "Boeb" sing yiengj ndeu, gyaeqqgaeq doek youq gwnz namh lo. Gou doq vaiqvut cung roengz laj laeuz bae, cibfaen saeqsim baez caengz baez caengz bokhai gij fuengzre. Mwh yawjraen aen gyaeqqgaeq haenx mbouj vaih saek di, ndeindup lumj gaeuq ninz youq ndaw "moeg", gou gikdoengh dwk angqhemq hwnjdauj: "Guhbaenz lo, gou guhbaenz lo!" Seizde, gij gaenjcieng caeuq yousim doq baez dog sanq liux lo.

Gyaeqqgaeq daem deihgiuz, gij saeh yawj hwnjdauj lumj mbouj hojnaengz guhbaenz neix, dauqfanj ginggvaq dou roengzrengz le caen guhbaenz lo. Doenggvaq gienh saeh neix le gou cij roxyiuj: Gwnzbiengz mbouj miz gijmaz mbouj bienq daengznauq, cijaeu raeuz gamj sawqniemh, miz damjliengh cauhamoq, couh itdingh ndaej cau ok gij saeh mbouj bingzciengz swhgeij guh haenx! (Louz Cinhboz raiz Liengz Cauzcieng hoiz)

Seizgan, Ngamqngamq Ndei

"Ding lingz lingz, ding lingz lingz....." Aen nauhcung youh caiq baez yiengj hwnjdauj lo.

Gou fwt daj gwnz mbonq naengh hwnq, baez yawj nauhcung, sawqmwh swenj sing ndeu: "Mbouj baenz lo, caiq mbouj hwnqdaeuq, couh yaek daengzgvaiz lo."

Gou vuengmuengz swiq naj cat heuj, fwngz nyaengq din luenh longz buhhagdangz hwnj ndang, fwngz ndeu gaem aen menbauh daxmeh senq ce hawj gou haenx, fwngz ndeu riuj daehsaw hwnjdauj, couh cung roengz laeuz bae.

Gij rumz haetromh miz di liengz, ci hawj gou saenzdwdwd. Youq gwnz haw hung, vunz bae vunz dauq, gou doq buet doq nyapnyuk, caeux rox yienghneix, couh wnggai caiq diuz sing nauhcung yiengj di dem.

Cienj gvaq diuz gai he, vunz noix haujlai, gou couh gyavaiq yamqdin. Sawqmwh, gou raen baihnaj miz aen ngumhngaeuz hwetgoz ndeu, byaij gyawj baez yawj, yienzlaiz dwg daxbuz byoemhau ndeu, de cingq saenzdedded nyoengx aen cisamloek cang doxgaiq feiq ndeu.

Loekci loemq roengz gumz henz loh bae, daxbuz geq haenqrengz nyoengx aen ci, hoeng doi geij mbat cungj mbouj doi ndaej doengh.

Gou yawj aen biuj, liz caet diemj lij ca ngeih cib faen cung. Danghnaeuz dingz roengzdaeuq bang, gig gojnwngz daengzgvaiz.

Hoeng.....gou haebhaeb heuj, "daengzgvaiz couh daengzgvaiz, gou mbouj ndaej bungz daengz cungj saeh neix couh buetdeuz ba! Bouxlawz heuh gou cingqngamj bungzraen gienh saeh neix ne?

Buet, gou coengzlaiz mbouj yienghneix guhvunz ha!" Siengj daengz neix, gou couh buet gvaqbae.

"Daxbuz, gou dauq bang mwngz ba!" Gou iet fwngz bae fuz gaiqdam cisamloek.

Daxbuz miz geij faen angq, youh miz di doeksaet dwk yawj gou: "Mbouj yungh la! Mbouj ndaej nguh mwngz, mboujne mwngz bae hagdangz couh daengzgvaiz lo."

"Mbouj youqgaenj, mbouj youqgaenj, cuengqsim lo!"

Yienghneix, dou itheij yungh rengz doi cisamloek, yienznaeuz gig gannanz, hix gig menh, hoeng doeklaeng gou caeuq daxbuz doengzcae roengzrengz le, doi ci ndaej hwnj aen gumz dauq lo.

"Docih mwngz, dahsau iq!"

"Mbouj guhhek, daxbuz, mwngz menh di!" Gou bang de dawz gij siengceij nyungq doek haenx cug ndei, da soengq de bae gyae, caiq yawj aen biuj, "mbouj ndei, caiq mbouj buet vaiq di, caen yaek daengzgvaiz lo....."

Gou gipmuengz buet bae hagdangz. Daengz bakdou hagdangz, gij hagseng laebdaeb haeuj hagdangz haenx gaenq mbouj lai lo.

Seizneix, ndaw sim gou yienznaeuz miz cibngeih faen simgip, cix gag miz cungj diemzvan ndeu saek rim bae.....

Cung haeuj gyausiz, gou myaeg aen cung venj gwnz ciengz da ndeu: "Haha, 7 diemj cung, ngamqngamq ndei!"

Dangz doegromh hainduj le, gou doq doeg saw, doq gag siengj, ngoenzneix ngamq ndei bungz daengz gienh saeh neix, couh suenq daengzgvaiz lo, bangcoh bouxwnq hix dwg gig miz yiui.

(Ciz Cauznganz raiz Loeg Haijdaek hoiz)



Duzngaeuz Rox Diuqfoux

Moix haemh cuengqhag ma ranz, gou cungj caeuq duzngaeuz gou guhcaemz yaep ndeu. Gou byaij de hix byaij, gou saet de hix saet. Miz ngoenz ndeu, gou gingqyienz raen de rox diuqfoux!

Ngoenzhaenx gwn caeuz sat, gij lohdaeng gyanghongh aenaen cungj rongh lo. Gou youq ndaw hongh gyaep duzngaeuz buet. Buet ha buet ha, gou daengx roengzdaeuq yietbaeg. Siengj mbouj daengz, duzngaeuz gwnz dieg mbouj daengx, de ndiengq din, lumj duz mbungqmbaj nei mbaeumbengmbeng baenq gien diuqfoux, duzngaeuz iqetet de yaep raez yaep dinj. Gou maeuq roengzdaeuq, sing iq cam: "Ngaeuz iq, mwngz baenzlawz gag diuqfoux ha?"

Duzngaeuz iq daengx roengzdaeuq, ndang miz di bibuengq, gou lumjbaenz dingqnyi gij sing nyaeq de: "Aenvih ndithaemh ngoenzneix gyaeu lai lo, rumz hix iq, gou ngah diuqfoux lai lo." Gou angq dwk ndwn hwnjdauj, caeuq de itheij diuqfoux. De gvaq swix, gou hix gvaq swix; de dik ga, gou hix dik ga..... Ronghndwen ciuq gyanghongh rongh cancan, dou yaep ndeu doxgek, yaep ndeu doxsoeb, lumj doiq youx diuqfoux habngamj ndeiraeuh ndeu.

Cijaeu sijsaeq cazyawj, couh rox henzndang gizgiz cungj miz gingheij. Duzngaeuz neix mbouj dwg duzngaeuz ndaemndwt bingzciengz ndeu, cixdwg duzngaeuz rox diuqfoux baenz baengzyoux ndei gou.

(Vangz Gingswngh)